

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-7-815/15
Sarajevo, 08.06.2015. godine

ZAPISNIK

3. VANREDNE SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 08. juna 2015. godine

Sjednica je počela u 14.30.

Sjednici je predsjedavala Lidija Bradara, predsjedavajuća Doma naroda.

Na početku sjednice, predsjedavajuća je pozdravila delegate, potpredsjednike Federacije Meliku Mahmutbegović i Milana Dunovića, premijera Fadila Novalića, zamjenicu premijera Jelku Miličevića, federalnog ministra poljoprivrede, vodoprivrede i šumarstva Šemsudina Dedića, federalnog ministra pravde Matu Jožića, predstavnike akreditiranih medijskih kuća i goste.

Izostanak sa sjednice opravdali su Slaviša Šućur, Sejo Bukva i Ivo Tadić.

Na osnovu evidencije Stručne službe, predsjedavajuća je konstatovala da sjednici prisustvuju 47 delegata pa Dom naroda može raditi i punovažno odlučivati.

Predsjedavajuća je obavijestila delegate da je Kolegij jednoglasno odlučio da se zbog neusaglašavanja Odluke o izboru predsjednika, zamjenika predsjednika i članova radnih tijela Doma naroda Parlamenta Federacije BiH ova tačka dnevnog reda skine sa današnje sjednice, što su delegati prihvatili.

Predsjedavajuća je otvorila raspravu o prijedlogu dnevnog reda.

U raspravi su učestvovali: Aner Žuljević, Daliborka Milović, Slobodan Tomić, Peđa Kojović i Osman Ćatić.

Predsjedavajuća je stavila na glasanje prijedlog Anera Žuljevića da se aktuelna politička situacija u Federaciji Bosne i Hercegovine razmatra kao tačka dnevnog reda.

Na osnovu rezultata glasanja, predsjedavajuća je konstatovala da Dom naroda Parlamenta Federacije nije prihvatio ovaj prijedlog jer je za glasalo 17 delegata, osam delegata je bilo uzdržano, a 19 delegata je bilo protiv.

Nakon toga stavljen je na glasanje prijedlog Anera Žuljevića i Slobodana Tomića da se Prijedlog Srednjoročne strategije razvoja poljoprivrednog sektora u Federaciji Bosne i Hercegovine za period 2015.-2019. godina razmatra u formi nacrt.

Na osnovu rezultata glasanja, predsjedavajuća je konstatovala da Dom naroda Parlamenta Federacije nije prihvatio ovaj prijedlog jer je za glasalo 14 delegata, devet delegata je bilo uzdržano, a 23 delegata su bila protiv.

Kolegij je razmatrao prijedlog Daliborke Milović da se u dnevni red ove sjednice uvrsti Prijedlog Odluke o prihvatanju zaduženja po Sporazumu o zajmu između Bosne i Hercegovine i Saudijskog fonda za razvoj za realizaciju Projekta "Razvoj infrastrukture u Goraždu" i odlučio da će se ovaj prijedlog uvrstiti u dnevni red sljedeće redovne sjednice.

Predsjedavajuća je, na osnovu rezultata glasanja, konstatovala da je Dom naroda Parlamenta Federacije Bosne i Hercegovine, sa 32 glasa za, uz pet uzdržanih glasova i uz tri glasa protiv, usvojio sljedeći:

D N E V N I R E D

1. **Prijedlog Srednjoročne strategije razvoja poljoprivrednog sektora u Federaciji Bosne i Hercegovine za period 2015. – 2019. godina,**
2. **Prijedlog Zakona o unutrašnjem platnom prometu,**
3. **Prijedlog Zakona o igrama na sreću,**
4. **Prijedlog Odluke o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj (IFAD) za realizaciju Projekta razvoja ruralnog poslovanja (RBDP),
Ugovor o finansiranju Projekta ruralnog poslovnog razvoja (RBDP) između Bosne i Hercegovine i Međunarodnog fonda za poljoprivredni razvoj,
Projektni sporazum, Projekt razvoja ruralnog poslovanja (RBDP) između Federacije Bosne i Hercegovine i Međunarodnog fonda za poljoprivredni razvoj,
Informacija o kreditu Međunarodnog fonda za poljoprivredni razvoj (IFAD) za finansiranje Projekta razvoja ruralnog poslovanja (RBDP).**

1. Prijedlog Srednjoročne strategije razvoja poljoprivrednog sektora u Federaciji Bosne i Hercegovine za period 2015. - 2019. godina

Prijedlog Srednjoročne strategije utvrdila je Vlada Federacije i dostavila Parlamentu Federacije radi razmatranja i usvajanja.

Predstavnički dom Parlamenta Federacije Bosne i Hercegovine je na 6. vanrednoj sjednici, održanoj 29. maja 2015. godine, usvojio Prijedlog Srednjoročne strategije razvoja poljoprivrednog sektora u Federaciji Bosne i Hercegovine za period 2015.-2019. godina. Tom prilikom je usvojio zaključke.

Prijedlog Srednjoročne strategije je obrazložio federalni ministar poljoprivrede, vodoprivrede i šumarstva Šemsudin Dedić, a prezentirao ju je Pejo Janjić, šef Odsjeka za ruralni razvoj u Federalnom ministarstvu poljoprivrede, vodoprivrede i šumarstva.

U raspravi su učestvovali: Damir Jukić, Osman Ćatić, Tomislav Martinović, Slobodan Tomić, Mirvet Beganović, Đuro Delić, Anes Osmanović, Admir Hadžipašić, Ismet Sarajlić, Draženka Subašić i Željko Josić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 29 glasova za, uz četiri uzdržana glasa i uz devet glasova protiv, usvojio Prijedlog Srednjoročne strategije razvoja poljoprivrednog sektora u Federaciji Bosne i Hercegovine za period 2015.-2019. godina.

Predsjedavajuća je stavila na glasanje zaključke predložene u raspravi i, na osnovu rezultata glasanja, konstatovala da je Dom naroda Parlamenta Federacije

Bosne i Hercegovine, sa 33 glasa za, uz četiri uzdržana glasa i uz tri glasa protiv, usvojio sljedeće:

ZAKLJUČKE

1. Obavezuje se Vlada Federacije Bosne i Hercegovine da Srednjoročnu strategiju razvoja poljoprivrednog sektora u Federaciji Bosne i Hercegovine za period 2015.-2019. godina dostavi svim naučnim i istraživačkim institucijama u oblasti poljoprivrede, kantonalnim ministarstvima poljoprivrede, poljoprivrednim udruženjima, Savezu općina i gradova Federacije Bosne i Hercegovine i nevladinim organizacijama kako bi do 01. oktobra 2015. godine mogli dostaviti primjedbe, sugestije, mišljenja i prijedloge Federalnom ministarstvu poljoprivrede, vodoprivrede i šumarstva.
Na osnovu navedenog Vlada Federacije Bosne i Hercegovine se obavezuje da do 31. decembra 2015. godine u parlamentarnu proceduru dostavi prijedlog izmjena i dopuna Srednjoročne strategije razvoja poljoprivrednog sektora u Federaciji Bosne i Hercegovine za period 2015.-2019. godina.
2. Zadužuje se Ured za reviziju institucija u Federaciji Bosne i Hercegovine da u skladu sa članom 18. Zakona o reviziji institucija u Federaciji Bosne i Hercegovine izvrši specijalnu reviziju u Federalnom ministarstvu poljoprivrede, vodoprivrede i šumarstva zaključno sa 31. martom 2015. godine.
3. Zadužuje se Vlada Federacije Bosne i Hercegovine da u izmjene i dopune Strategije razvoja poljoprivrednog sektora u Federaciji Bosne i Hercegovine za period 2015.-2019. godina razmotri primjedbe, prijedloge i sugestije iznijete na sjednicama domova Parlamenta Federacije Bosne i Hercegovine i one koje će biti dostavljene Federalnom ministarstvu poljoprivrede, vodoprivrede i šumarstva.

2. Prijedlog Zakona o unutrašnjem platnom prometu

Prijedlog Zakona utvrdila je Vlada Federacije Bosne i Hercegovine.

Predstavnički dom Parlamenta Federacije Bosne i Hercegovine je na nastavku 31. sjednice, održane 08. jula 2014. godine, usvojio Prijedlog Zakona o unutrašnjem platnom prometu uz ispravku štamparske greške, koju je naveo federalni ministar finansija a to je da se u stavu 4. u članu 6. brišu riječi: "na njihov zahtjev".

Prijedlog Zakona obrazložila je federalna ministrica finansija Jelka Milićević.

U raspravi su učestvovali Tomislav Martinović, Osman Čatić i Draženka Subašić.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 29 glasova za, uz četiri uzdržana glasa i uz četiri glasa protiv, usvojio Prijedlog Zakona o unutrašnjem platnom prometu.

3. Prijedlog Zakona o igrama na sreću

Prijedlog Zakona utvrdila je Vlada Federacije Bosne i Hercegovine.

Predstavnički dom Parlamenta Federacije Bosne i Hercegovine je na nastavku 30. sjednice, održane 04. juna 2014. godine, usvojio Prijedlog Zakona o igrama na sreću sa tri amandmana Vlade Federacije Bosne i Hercegovine i osam

amandmana koje je Vlada Federacije Bosne i Hercegovine prihvatila pa su postali sastavni dio Prijedloga Zakona.

Amandmani Vlade Federacije Bosne i Hercegovine odnose se na čl. 88., 110. i 134. Prijedloga Zakona.

Amandmani koje je Vlada Federacije Bosne i Hercegovine prihvatila odnose se na čl. 90., 92., 85., 7., 113., 123., 124. i 133. Prijedloga Zakona.

Amandmani Vlade Federacije Bosne i Hercegovine glase:

Amandman I.

Član 88. se briše.

Čl. od 89. do 138. postaju čl. od 88. do 137.

Amandman II.

U članu 110. u stavu 2. u drugom redu iza riječi: "tačka" broj: "2" zamjenjuje se brojem: "3".

Amandman III.

U članu 134. u stavu 2. umjesto tačke piše se zarez i dodaje tekst: "i propisima donesenim na osnovu ovog zakona".

Amandmani koje je Vlada Federacije Bosne i Hercegovine prihvatila glase:

Amandman I.

U članu 90. u stavu 3. iza tačke 17) dodati tačku 18) koja glasi:

"18) suglasnost nadležne općinske službe za obavljanje djelatnosti u prostorima uplatnih mjesta. Ukoliko općina na zahtjev priređivača za izdavanje suglasnosti ne postupi po istom u roku 10 dana od dana prijema zahtjeva, smatrat će se da je data suglasnost."

Amandman II.

U članu 92. u stavu 1. tač. 4), 5), 6) i 7) zamijeniti tač. 1), 2), 3) i 4).

Amandman III.

U članu 85. u stavu 1. tačka 11) mijenja se i glasi:

"11) način i rok isplate novčanih dobitaka koji mora iznositi najviše 30 dana od dana objavljivanja konačnog izvještaja o rezultatu događaja".

Amandman IV.

U članu 7. u stavu 2. u alineji 4. nakon riječi: "učestvovanje u" dodati riječi: "liječenju, prevenciji i borbi protiv ovisnosti o drogi, alkoholu, igrama na sreću i kocki".

Amandman V.

U članu 113. dodati novi stav 5. koji glasi:

"Aplikacija za registraciju igrača u igrama na sreću putem interneta sadržavat će sve potrebne mehanizme za onemogućavanje registracije maloljetnih osoba."

Amandman VI.

U članu 123. u stavu 1. nakon riječi: "štampanom materijalu" dodati riječi: "i internet portalima namjenjenim djeci i mladima".

Amandman VII.

U članu 124. dodaje se stav 3. koji glasi:

“Porezna uprava će svake godine najkasnije do 31. marta dostaviti Odboru za ekonomsku i finansijsku politiku Predstavničkog doma, te Odboru za ekonomsku i razvojnu politiku, finansije i budžet Doma naroda Parlamenta Federacije Bosne i Hercegovine, prikazano po kantonima, tabelarni izvještaj sa podacima o izvršenim kontrolama, sankcijama, propisanim i naplaćenim kaznama, kao i o novoregistriranim priređivačima igara na sreću, te naplati njihovih prihoda.”.

Amandman VIII.

U članu 133. dodaju se st. 3. i 4. koji glase:

“Novčanom kaznom u iznosu od 500,00 KM bit će kažnjen roditelj, staratelj ili usvojitelj maloljetnika u dobi do navršениh 16 godina koji se zatekne u učestvovanju u igrama na sreću.

Novčanom kaznom u iznosu od 500,00 KM bit će kažnjen stariji maloljetnik koji ima od 16 do 18 godina, a koji se zatekne u učestvovanju u igrama na sreću.”.

Na prijedlog ovog zakona amandmane su podnijeli Anes Osmanović, Almedin Aliefendić i Tomislav Mandić, u ime Kluba delegata hrvatskog naroda.

Prijedlog Zakona obrazložila je federalna ministrica finansija Jelka Milićević.

U raspravi su učestvovali: Tomislav Martinović, Osman Ćatić, Almedin Aliefendić i Anes Osmanović. Predsjednik Kluba delegata hrvatskog naroda u Domu naroda Tomislav Martinović je, u ime Kluba, izjavio da će Klub odustati od amandmana, ali je predložio Zaključak kojim se zadužuje Federalno ministarstvo finansija da u sljedećih šest mjeseci prati rezultate primjene ovog zakona, te eventualna poboljšanja i korekciju uputi u parlamentarnu proceduru u vidu izmjena i dopuna ovog zakona do kraja 2015. godine.

Anes Osmanović i Almedin Aliefendić su, također, odustali od svojih amandmana, ali su zatražili da ih Vlada Federacije uzme u obzir prilikom izrade izmjena i dopuna ovog zakona.

Federalna ministrica finansija je izjavila da prihvata ove amandmane kao inicijativu, kao i Zaključak koji je predložio Klub delegata hrvatskog naroda u Domu naroda.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovine, sa 33 glasa za, uz četiri uzdržana glasa i uz tri glasa protiv, usvojio Prijedlog Zakona o igrama na sreću.

Predsjedavajuća je stavila na glasanje Zaključak koji je predložio Tomislav Martinović, u ime Kluba delegata hrvatskog naroda u Domu naroda, i konstatovala da je Dom naroda Parlamenta Federacije Bosne i Hercegovine, sa 31 glasom za, uz sedam uzdržanih glasova i uz tri glasa protiv, usvojio sljedeći:

ZAKLJUČAK

Zadužuje se Federalno ministarstvo finansija da u sljedećih šest mjeseci prati rezultate primjene ovog zakona, te eventualna poboljšanja i inicijative sa ove sjednice uputi u parlamentarnu proceduru u vidu izmjena i dopuna ovog zakona do kraja 2015. godine.

**4. Prijedlog Odluke o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj (IFAD) za realizaciju Projekta razvoja ruralnog poslovanja (RBDP) Ugovor o finansiranju Projekta ruralnog poslovnog razvoja (RBDP) između Bosne i Hercegovine i Međunarodnog fonda za poljoprivredni razvoj Projektni sporazum, Projekt razvoja ruralnog poslovanja (RBDP) između Federacije Bosne i Hercegovine i Međunarodnog fonda za poljoprivredni razvoj
Informacija o kreditu Međunarodnog fonda za poljoprivredni razvoj (IFAD) za finansiranje Projekta razvoja ruralnog poslovanja (RBDP)**

Prijedlog Odluke utvrdila je Vlada Federacije Bosne i Hercegovine i dostavila Parlamentu Federacije radi razmatranja i donošenja.

Predstavnički dom Parlamenta Federacije je na 1. sjednici, održanoj 13. maja 2015. godine, donio Odluku o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj za realizaciju Projekta razvoja ruralnog poslovanja. Tom prilikom je usvojen i Zaključak.

U raspravi niko nije učestvovao.

Predsjedavajuća je konstatovala da je Dom naroda Parlamenta Federacije Bosne i Hercegovine, sa 30 glasova za, uz tri uzdržana glasa i uz osam glasova protiv, donio Odluku o prihvatanju zaduženja po Sporazumu o finansiranju između Bosne i Hercegovine i Međunarodnog fonda za poljoprivredni razvoj za realizaciju Projekta razvoja ruralnog poslovanja (RBDP).

Sjednica je završena u 17 sati i 30 minuta.

* * *

Transkript sjednice čini sastavni dio Zapisnika.

SEKRETAR

Izmir Hadživdić

PREDSJEDAJUĆA

Lidija Bradara